

D E

METROPOLI

MEDIOLANENSI.



MEDIOLANI,

Ex Officina Typographica quon. Pacifici Pontij.

M. D. XCVI.

DE
METROPOLI
MEDICOLANENSIS.



MEDICOLANENSIS

Ex Officio Medici, et Pharmaciae, et Chirurgiae, et
Fisicorum, et Medicorum, et Chirurgorum, et
Fisicorum, et Medicorum, et Chirurgorum, et

AN. D. M. C. C. C.

ILLVTSRIS S.^{MO}

AC REVEREN.^{MO}

D.D. FEDERICO

BORRROMEO

S. R. E. Cardinali, ac Mediola-
nensi Eccl. Archiepis.

Augustinus Tradatus Bibiliopola.

S. D.

VNC de Metropoli

Mediolanēsi libellum

Reuerendiss. Caroli à

Basilicapetri Noua-

riensis Episcopi labore cōscriptum,

eod. in scio à doctissimo I. C. Hier.

à Basilicapetri typis iterum man-

dare iussus; tibi FEDERICE

Cardinalis amplissimè potiusquā

ulli aliq offerendum duxi; nam &

de iurisdictione agit, & de factis
eius Ecclesie Archiepiscoporum, cui
tu tanto cum omnium cōsensu, tan-
taq; cum laude præs; & ab eo est
scriptus, qui tui quàm studiosissi-
mus est, & cum eiusdem Ecclesie
presbyter esset, Carolo fœlicis recor-
dationis patrueli tuo carissimus
fuit eius et res præclare gestas, mo-
resq; sanctissimos, postea Clericus
religionis Sancti Pauli Decollati,
perpetuæ omnium memoriæ eloquē-
tissime mandavit. Accipe igitur
Præsul amplissime pignus hoc re-
uerentiæ erga te meæ animo quo so-
les gratissimo, meq; tibi addictissi-
mum, in tuam fidem ac tutelam
suscipere ne graueris, Vale.

Summa eorum quæ in libello de
Metropoli Mediolanensi
continentur.



- 1 **Q**U I fuerint incola prouinciæ Mediolanensis ante Gallos, & quæ urbes tunc initium habuerint.
- 2 Vt eadem prouincia Gallia facta sit; quæ eius regiones; & quæ urbes à Gallis conditæ dicantur.
- 3 Vt in ius venerit Romanorum, Mediolani & aliarum urbium commemorata dignitas.
- 4 Mediolanensis urbis præcipua dignitas in tota prouincia sub Imperatoribus.
- 5 S. Barnabam Apost. Euangelium Mediolanensi urbi, ac prouinciæ primum attulisse, ibiq; consedisse.
- 6 Argumentum ex sede regia, & Apostolica. & de iure Metropolitico veteri.
- 7 De antiquitate Episcoporum Prouinciæ Mediolanensis.
- 8 Actiones Metropolitana Episcopi Mediolanensis de Episcopis Dertonensi Ecclesiæ datis à SS. Calimero, Maternoq; de S. Dionysij Mediolan. primo loco in subscribendo, deq; narratione quadam Vercellensium non uera.

7
DE METROPOLI
MEDIOLANENSI,



ICTVRI de Metropoli
Mediolanensi; originem
prius ac veterem statum
regionis, Ciuitatumq; ip-
sius ante Christum natum
repetemus: ea tantum commemorantes;
quæ aliquid earum dignitatis, alit excel-
lentia demonstrent. Ad salutis deinde
tempora veniemus. Erit hoc quasi de
stipite siluestri agere; vt ad arbores ip-
sam postea domesticis, ac fructuosis ra-
mīs insitis cohonestatam veniamus. Mo-
riemur autem ante omnia; ne quis a no-
bis tralatitia quædam, vel fabulosa vrbium
initia expectet; quæ multi scriptis suis
tradidere. Scribit Liuius datam esse hanc
veniam antiquitati, vt humanis diuina
miscendo primordia vrbium augustiora
faceret; & origines suas consecrans, ad
Deos referret auctores. quod magni iu-
dicii vir minimè probare videtur; poe-
ticisq; dicit ea esse magis decora fabulis,
A 4 quàm

quàm incorruptis rerum gestarum monumentis. Sed neque omninò improbat, vt Martem ipse quoque populi Romani, de quo scribit, auctorem faciat. Nostri, qui diuinò munere illustrati, Deorum commenta, fabulasq; reiiciunt, leuitatem tamen veterum illorum imitantur: ac vel ad gentium fabulosos heroes, seu Deos; vel ad ipsos Noc filios, patriæ originem vnusquisque nititur referre; idque ex plerumq; assèueratione, eoq; conatu, vt si res narraret planè compertas. quæ tamen, cum neque veris similia sint; neque ab hominibus eruditis, aliquonè allato probato testimonio dicantur, omittenda sunt, vt ne refelli quidem possint sine leuitatis, aut ineptiæ culpa. Nolumus etiam ea curiose indagare, quæ nonnulli maiore quidem doctrinâ, sed non maiore fortasse veritate, pro huiusmodi originibus ex dubijs auctoribus, & argumentis in medium afferunt. Laudandum in ijs ingenium; sed simplex tamen veritas potius est amplectenda; hoc præsertim loco, vbi præcipua tantum, ac certa harum rerum testi-

monia nobis sumenda sunt.

• Igitur grauiſſimi auctores Mediolani,
& reliquarum ferè vrbiũ totius regio-
nis originem referunt ad Gallos: qui
Tarquinio Romanorũ Rege in Italiam
traiecerunt. Sed iſdem indicant, ante
quam Galli aduenirent, & populos, &
vrbes in hac Italiæ parte fuiſſe: neq; verò
exiſtimari poteſt, fertiliſſimam regionẽ,
humanitatequẽ ſemper celeberrimam
tum deſertam fuiſſe, cum Gallia, & Ger-
mania multitudinẽ hominũ ſuorum
capere vix poſſet: itaque polybius Tyr-
rhenos ſcribit hanc regionem primo te-
nuiſſe: Gallos vero eius fertilitate pelle-
ctos, exercitũ comparato, in Tyrrenos
impetum feciſſe: campos occupari. cã-
pos ipſe, hanc Italiæ partẽ inter Apen-
ninũ, & Alpes, omnis Europæ maxi-
mos, atq; vberriſimos appellat, forma quaſi
triangulari: quorũ copiam, atq; uber-
tatem, tum hominũ proceritatẽ multiſ
deſcribit. Liuius Tuſcos ait ad inferum,
ſuperumquẽ mare longe, lateque impe-
raſſe: omnia etiam loca inter Apenninũ,
& Alpes, excepto Venetorum angulo, te-
nuiſſe:

lib. 2. c. 11

lib. 3.

nuisse: cum vrbes duodecim intra Apen-
 ninum haberent; totidem trans eum co-
 lonias misisse. Tusci igitur imperabant
 in hac regione; & quidem, vt intelligen-
 dum est, regionis ipsius populis; populos
 eiusmodi ante Gallos. Linus ipse memo-
 rat, Insubres, Leuos, Libuos. pro duo-
 bus autem postremis putatur. Polybius
 dixisse Laos, & Lebedios; quos propius
 Alpes collocat, quam Insubres. Sed Li-
 uius Leuos quidem circa Ticinum amne
 incoluisse ostēdit, vt facile cum Polybio
 consentiat: Libuos verò eam partē, vbi
 Brixia est: ac Plinius videri potest cum
 Polybio consentire; dum Vercellas op-
 pidum Lybicorum dicit. Idem vero Pli-
 nius plures prodit regionis populos: de
 quibus tamen singulis, Galli ne fuerint,
 an Italici nō satis clare affirmat: Sallyos;
 Libycos; Vertacomacoros; Leuos, &
 Maricos, quos Ligures dicit; Orobiosq;
 Mitto populos Alpinos; & etiam Ligu-
 res; quamquā hī potissimum ad mare
 inferum incoluerunt. Fuerunt igitur an-
 te Gallos huius regionis populi, & vrbes:
 quarum historia tamē nulla est. nam re-

lib. 3. c. 17

E. 44

rum Romanarum scriptores nostra ferè
 non attigerunt; nisi quātum necesse fuit
 propter bella, quæ cum Romanis postea
 gessere Galli. atque ita vel vrbium ipsa-
 rum initia ab ipsis tantūmodo Gallis du-
 xerūt; à quibus verisimile tamen est, op-
 pida aliqua fuisse condita, vel aucta; no-
 mina etiam mutata, vt suorum memoriā
 renouarent. Mediolanum à Gallis con-
 ditū dicit Liuius; ab Insubribus Plinius;
 qui tamen nō satis explicat ab Insubribus
 ne Italis vrbis condita sit, qui priores Gal-
 lis locum tenuere; an à Gallis Ceduis,
 quorum pagum ait Liuius Insubribus no-
 stris fuisse cognominem: sed si Catonis
 fragmenta, quæ habentur, apud nos va-
 leant; tum Toscos, tum Italos Insubres
 auctores esse vrbis, quod alioqui etiam
 valde probabile est, affirmabimus: non
 autem Gallos. Vercellas quoque, No-
 uariam, & Ticinum idem auctor quem-
 admodum, & Plinius ad antiquiores po-
 pulos refert. item Comum, ac Bergomū;
 si ita interpretandum sit quod ait, stirpis
 hæc duo oppida fuisse Orobiorum. S
 2. Verum quidquid sit, vt ad Gallorum
 tem-

tempora veniamus : prisco Tarquinio
 Romæ regnante, hoc est anno ab vrbe
 condita circiter centesimo quinquagesi-
 mo : ante Christum natum ad sexcentesi-
 mum; Liuius ait, Ambigatum Celtarum
 Regem, quæ pars Galliæ tertia est, regnū
 suum, quod præ hominum multitudine
 vix administrare poterat, exonerare vo-
 luisse. ideo Bellouesum, ac Sigouesum
 sororis filios, impigros iuuenes delegis-
 se : qui populis sibi, quos vellent, & quo
 numero vellent, adiunctis, alias sibi que-
 rerent sedes : Belloueso sorte obtigisse,
 ut in Italiam iret : atq; cum Biturigibus,
 Aruernis, Senonibus, Aeduis, Ambar-
 ris, Carnutibus, Aulercis, Alpes Tauri-
 no saltu superasse : Tuscos haud procul
 Ticino flumine acie fudisse : in agro In-
 subrium confedisse ; Mediolanum con-
 didisse. alias vrbes ab illis ædificatas Li-
 uius non commemorat. tantum, Ger-
 manos, (alij Cænomanos legunt) Elito-
 nio duce itidem Alpes transgressos con-
 fexisse in Libuis ; vbi inquit, nūc Brixia,
 & Verona est ; Saluios quoque secutos,
 antiquam gentem Leuos Ligures, circa
 Tici-

Ticinum incolentes, expulisse. Boios
 deinde, Lingones, Senones aduenisse.
 omnia denique inter Apenninum, & Al-
 pes occupasse. Iustinus ab Gallis nō Me- lib. 20. ad
 diolanum solū, sed Comum etiam, Bri- fin.
 xiam, Veronam, Bergomum, Tridentū,
 Vicentiam, Tuscis pulsīs, conditas esse,
 ex Trogo Pompeio memoriæ prodidit.
 Paulus Diaconus etiam Ticinum urbem
 ab eis conditam scribit; quāquam ut ho-
 mo, qui multis post sæculi scripsit, in eo
 errare videatur, ut pro Belloueso eorum
 Gallorum duce, qui in Italiam venerunt
 Brennum nōminet eorum ducem, qui
 Romam cœperunt. Cum igitur Galli
 hanc totam Italiæ partem occupauerint,
 suasq; in ea sedes posuerint; & vniuersa
 dicta est Gallia Cisalpina, seu citerior; &
 eius partes veteribus ferè nominibus o-
 missis, Gallica nomina receperunt. Re-
 gionem, & quæ gentes in ea essent, ita
 distinguit Polybius: inter Padum, & Al-
 pes, quæ pars appellata est transpadana;
 primo collocat Laos, qui leui putantur;
 mox Lebecios; deinde Insubres; post
 eos vero Cœnominos: loca maris Adriat-
 tico

tico vicina Venetis relinquens . In altera parte, quæ est inter Padum, & Apenninum, primò ponit Ananes, postea Boios, inde Eganes, postremò iuxta mare Adriaticum, Senones . tot nationes, tum indigenæ, tum Gallicæ, in has tantum ex Polybij sententia euasere . sed hæ ipsæ ad quattuor fere, quantum ex veteribus historijs apparet, postea redactæ sunt, seu in eas transfusæ, Senones, Boios, Cœnomanos, Insubres : ex quibus Insubrum tantummodo nomen ex veteribus *Ital*is mansit . Quid autem ipsis populis antiquis factum sit, dubiū videri potest . Sed credibilius est, mansisse, & vnacum barbaris habitasse, sicuti postea de Longobardis euenit . nimirum ob eius fertilitatem hæc fuit Italiæ cōditio ; vt exteri locorum commoditate capti, in eam se se, suis relictis sedibus, inferrent . ipsa exteros quidem subiugaret ; sed suas nollet mutare sedes . ac tāta est cæli clementia, & regionis, vt ita dicam, humanitas : vt illatam barbariem semper temperaret, & ad humanitatem paulatim perduceret : quamquam et illud in eo genere profuit, quòd

quòd magna ex parte barbaram gentes pos-
 se à bello victas, etiam pulsas, & eiectas
 sunt. Tuscorum tamen multitudo; vt
 Trogus, Liniussque docent; non mansit
 sed Gallos fugies duce Rhæto Alpes pe-
 tijt; vnde Rhæti extiterunt, qui contra
 locis ipsis alpinis, vt ait Linius, efferati;
 linguæ sonum tantummodo, eumque nō
 incorruptum retinuerunt. eorum me-
 tropolis nunc Curia est trans Alpes sita.
 3. Ducentis prope annis Galli Romanos
 acerrimis, periculosissimisque bellis fati-
 garunt. primo subiugati fuere Senones
 anno ab vrbe condita quadringentesimo
 septuagesimo; ad quos nostræ metropo-
 lis ius postea peruenisse nō reperio: nam
 & ea pars statim vsq; ad Rubiconem Ita-
 lia adiuncta est, Galliaq; adempta. Boij
 deinde superati sunt anno quingentesi-
 mo vigesimo octauo, & ad deditionem
 compulsi. demum autem Insubres: nam
 Cœnomani legationibus Romanorum
 deliniti, amicitiam pop. Roma., vt Po-
 lybius ait, societati Gallorū prætulerunt.
 Insubrum ingentem nationem idem au-
 thor appellat; ac re ipsa demonstrat. scri-
 bit

Sigon. in
 fast. ann.
 470.

bit enim, cum Galli reliqui, vel à Romanis iam victi essent, uel eorum socij effecti: Principes Insubrum cum Romanis decernere statuisse: & signis aureis quibusdam è templo Mineruæ sublati, quinquaginta hominum millia aduersus Romanos, inmo & contra Gallorum partem, profectos fuisse: victos bellum redintegrasse, conductis è transalpinis regionibus Gestatarum triginta millibus. Consules autem Romani cū exercitu in Galliam profecti, urbem Gallorum *Acerras* oppugnarunt; eam *Gaudentius Merula* putat fuisse, quæ nunc nobilis est vicus in diocesi Nouariensi vltra *Ticinum* amnem, & *Ceredanum* dicitur; *Tristanus* verò in *Padi* ripa urbem fuisse putat. Insubres cōtra ad *Clastidium* oppugnandū, quod non multo ante in potestatem Romanorum venerat, se se contulerunt. *Marcellus* consul; collega ad *Acerras* relicto, ad liberandum *Clastidium* profectus, eos *Virдумaro* Rege interfecto superauit. deinde *Mediolanum* cepit anno ab urbe cōdita quingentesimo trigesimo primo. *Polybius*, *Plutarchus*, *Zonaras*, & alij aucto-

ib. 1. de
ant. iu. It.
cap. 24.

auctores. Insubriam, Sigonius obseruat,
 a Ticinò ad Ollium flumen; item ab Alpi-
 bus ad Padum pertingere: Acerras quo-
 que, & Nouariam ultra Ticinum, item
 ultra Padum tenuisse Clastidium videtur;
 sed est etiam verisimile pro bellorum va-
 rietate, has gentes suos fines non nihil va-
 rios habuisse. Præcipuam vero Insubrū
 ciuitatem Mediolanum, & Polybius idem
 appellat, & ratio huius postremi belli de-
 monstrat. Polybium secutus Strabo Me-
 diolanum fuisse dicit Insubrum Metro-
 polim: & pagum tamen; quòd Insubres
 primò per pagos habitarent. in quo signi-
 ficasse videtur, quæ Polybius scribit de
 moribus Gallorum, quos tamen satis cito
 moderatos Italiæ humanitate fuisse, du-
 bium non videtur. Suo verò tempore,
 hoc est Paulo antè Christum natum, Me-
 diolanum insignem dicit fuisse urbem;
 ἐξιολογον πόλιν. Plutarchi verba victoriam
 Marcelli narrantis, hæc sunt latinæ reddi-
 ta, Hostibus magna ex parte cæsis, lectis-
 que spolijs, reuertitur ad collegam, cui res
 aduersus Callos bellum gerenti, ad urbem

lib. 5. in
 descript.
 Ital.

In vita
 Marcelli.

uis totius fere Galliae, & Liguria urbes (vii
mur nunc antiquis nominibus) ad Medio
lanensem Metropolim ex narratis perti
nuisse videantur; non omnes tamen sub
tiliter persequar; sed eas præcipue, quas
alijs argumentis in Metropoli contentas
esse postea demonstrabo. Ultra eam, quæ
Boiorum fuit, regionem, non videtur Me
tropolis ius esse perductum. In hac verò
quæ etiam Gallie rogata nomen habuit;
hæ fuerunt ciuitates; Bononia; Mutina;
Parma; Placentia; Cremona; Colonia; va
rijs temporibus; a Romanis deductæ, vel
præsidio contra Gallos, vel vt in loca de
Gallis capta Romanâ gens propagaretur;
de quibus nihil fere insigne suppetit, &
ex antiquitate referatur; nisi Placentiam,
& Cremonam illustres urbes à Strabone
appellari; Mutinam a Cicerohe dici præ
sidium, ac propugnaculum Pop. Rom. In Phi
lip.
aliae urbes fori nomine sunt appellatæ,
quod sedes iuris dicendi, vel iudicatio
nis ibi a Romanis constitutæ esset. Forū
fuit Regium Lepidi; & Cornelij; quæ
vrbs deinde Imola dicta est. de Fauentia;
alij.

.i. du Gallia provincia facta, nihil reperimus;
 quamobrem Mediolanensis metropolis
 condicionem esse mutatam iudicemus, an-
 norum fere ducentorum spatio usque ad
 Imperatores; neque etiam postea, ut de-
 monstretur plurima vero sunt indicia, pre-
 stantiam eius, quæ potuit in tali statu ser-
 uari, perseuerasse. Conuentus ab eis qui
 provinciam obtinerent, ibi actos, iusq; di-
 ctū; Praetoresque, ac procons. ibi resedisse;
 & est verisimile, ex conditione urbis; &
 .2.3. .c. dil
 .51. ui ob
 .16. lib. 1. Sigonius scripsit in ijs, quos de antiquo iu-
 re, & de regno Italiæ, conscripsit libris .70.
 .o. Certe Cæsarem, credibile est, etiam
 opportunitate transalpinæ Galliarum regen-
 dæ, quemadmodum, & posteris tem-
 poribus Imperatores, ibi conuentus eos
 egisse; ad quos, ut ipse scribit, citra alpes
 veniebat, quam ad rem aliquo modo fa-
 cit, quod de eius magna modestia Medio-
 lani adhibita Plutarchus narrat, cum apud
 Valerium Leonem cenasset. Ac procons.
 hic moratum fuisse, iusque dixisse, Sueto-
 nius ostendit, de C. Albutio Silo Noua-
 ricensi rhetore agens, In cognitione cedis,
 inquit,

lib. 1. inf.
 lib. 6. in fi.

Decl.
 rhetor.

inquit, Mediolani apud L. Pisonem Pro-
 consulem, defendens reum, cum cohibe-
 rent lictores nimias laudantium voces; ira
 excanduisse, ut & deplorato Italiae statu,
 quasi iterum in formam prouinciae redi-
 geretur; M. in super Brutum, cuius statua
 in conspectu erat, inuocaret, legum, aeli-
 berratis auctorem, ac vindicem; pene pe-
 nias luit. Bruto posita videtur statua, cum
 Galliam magna cum virtutis laude antea
 administrasset. eam Plutarchus statuam
 æream fuisse ait affabre factam, quam Cæ-
 sar Augustus, postea cum Mediolani vi-
 disse, præterijt. mox subsistens vocauit
 Magistratus; fractam sibi fidem questus
 est; Mediolanenses hostem suum apud se
 habere, negabant illi, vicissimque admi-
 rantes, se se intuebantur, conuersus Cæsar
 ad statuam; nonne hic stat, inquit, hostis
 noster. obmutuere illi. at Cæsar arridens
 eos laudauit; quod amicis etiam in aduer-
 sis rebus fidem suam præstarent: iussitque
 ne statua suo loco moueretur.

20A. 21V
 cc. 1922

Cóparat.
 Dionis cū
 Bruto.

20B. 21V

4 Hic agendum erat, quoniam ad salutis
 tempora ventum est, de huius Metropoli

211A

B 4 ticæ

Vit. Aug.
cap. 10.

tica vrbis ecclesiastica dignitate: sed cum
de ijs ornamentis agere ceperimus; quæ
ab Imperatoribus ad conseruationem ex-
cellentie suæ habuit; prosequemur alia-
quasi præcurrentes, quæ in hoc genere
præcipua nobis occurrunt. deinde ad ec-
clesiæ initia reuertemur. Imperatores er-
go Augusti morem secuti sunt; quem Sue-
tonius scribit ob quædam transalpina bel-
la; vt vel interueniret, vel non longe ab-
esset; Ratiennam, aut Mediolanum; aut
Aquileiam venisse. & vt quæque pars erat
prouinciæ, vnde bellum oriebatur, com-
modior; ita in ea parte, quæ amplissima
vrbs, & Imperatoriæ Maiestati magis apta
videbatur, eligebant, in qua commoraren-
tur, & bellica negotia tractarent. omnino
Mediolani multum fuisse Imperatores;
regijsque ornamentis decoratam fuisse
urbem; & ita suam retinuisse in tota regio-
ne præstantiam; certissimis demonstratur
argumentis. Mittamus quod Blondus ge-
neratim ait; post Marcelli triumphum,
urbem Mediolanum adeo pacatam, flo-
rentemque fuisse; vt Nerua, Traianus,
Adria-

In Lóbar.

Adrianus, & alij deinceps Rom. Principes, quoad per occupationes licuit, Mediolani habitauerint: nosque attingamus singula: grauius tamen: non enim placet, historicorum loca quasi mendicare, quibus appareat, aliquem ex Imperatoribus Mediolani fuisse; aut etiam ex ea ortum esse. illud fortasse non prætermittendum; uxorem Seueri, nondum tamen Imperatoris, Iuliam, filium Getam Mediolani peperisse, vt Spartianus auctor est. nō enim casu locus eligitur, vbi Principum virorū uxores pariant. Illud etiam ad rem videtur pertinere; quod scribit Orosius; Galienum, cum rep. deserta Mediolani libidinibus inseruiret, occisum esse: licet alij circa Mediolanum occisum scripserint. illud item; post eius mortem, Aureolum Imper. appellatum Mediolani cōsedisse. Sed multo illustrius, quod Mamertinus in Genethliaco Maximiani scribit, de vtroq; Imp. Diocletiano, & Maximiano loquēs, cum Mediolanū traiectis alpibus venere: Quale, inquit, pietas vestra spectaculum, dedit cum in Mediolanensi palatio admis-

lib. 7. c. 22

sis,

sis, qui sacros vultus adorauerant, con-
 specti estis ambo; & consuetudinem sim-
 plicis venerationis geminato numine re-
 pente turbastis, nemo ordinem numinum
 solita secutus est disciplina; omnes adoran-
 di mora restiterunt, duplicato pietatis of-
 ficio contumaces. Atque hec quidem ve-
 lut interioribus sacrarijs operata veneratio
 eorum modo animos obstupefecerat, qui-
 bus aditum vestri dabant ordines dignita-
 tis, vt vero limine egressi per mediam vr-
 bem simul vehebamini; recta ipsa se, vt au-
 dio, pene commouerunt, omnibus viris,
 foeminis, paruulis, senibus; aut per fores
 in publicum proruentibus, aut per supe-
 riora cedium limina imminentibus, clama-
 re omnes præ gaudio, iam sine metu ve-
 stri; & palam manu demonstrare: Vides
 Dioclecianum, Maximianumque? vides?
 ambo sunt, pariter sunt, & paulò infra.
 Ipsa etiam gentium domina Roma, im-
 modico propinquitatis vestræ elata gau-
 dio, vosque e speculis suorum montium
 prospicere conata, quo se vultibus vestris
 propius expleret, ad intueudum cominus,

quantum potuit, accessit: lumina siquidem
 Senatus sui misit beatissimæ illi per eos
 dies Mediolanensium Civitatis similitudi-
 nem maiestatis suæ libenter imperiens;
 ut ibi tunc esse sedes imperij videretur,
 quo vterque venerat Imperator. hæc Ma-
 rcellinus. Sed ea letitia versa est in luctu
 Mediolanensibus, pijsque omnibus, cum
 scilicet principes coeperunt christianos
 ubique persequi. Traditur Maximianus
 regia multa monimenta Mediolani reli-
 quisse; quippe qui etiam Mediolanensis à
 quibusdam dicatur. imperium certe ibi
 deposuit: ac etiam cū Massiliæ iussu Con-
 stantini strangulatus esset; eius cadauer
 Mediolanum delatum est; de cuius sepul-
 chro S. Ambrosius commemorat in episto-
 la ad Theodosiū. Delegit eandem urbem
 Constantinus, in qua sororis Constantiæ
 nuptias celebraret, quam Licinnio in ma-
 trimonium collocavit; ut Zosimus scribit.

Zon. & r
 alij.
 Sigon. de
 imp. occ.
 lib. 2. 309
 ep. 34.
 & 37. &
 37. &

lib. 2.

in l. 3

Impe-

Imperatores demonstramus Mediolani, tamquam in primaria, atque amplissima ciuitate frequenter, ac diu moratos esse, regiasque celebritates egisse. nam de reliquis etiam Imperatoribus perfacile est idem ostendere; Cōstante, & Constantio filijs, Iuliano, Valentiniano seniore, ac iuniorē, Gratiano, Theodosio, Honorio: quemadmodum ex Ammiano Marcellino; & S. Ambrosio, alijsque scriptoribus passim vnusquisque potest facile cognoscere. Aedificia publica regio splendore ibi posita idem plane demonstrant. Palatium Imperatoris iam prodidit Mamertinus: adiungas licet Ammianum; qui Constantij res gestas narrans, & eum ipsos annos Mediolani habitasse ostendit; & regiae mentionem facit, in qua ille morabatur. ibi etiam Iulianum Cēsarem fecisse, & ei Helenam sororem in matrimonium dedisse; vnde etiam in Germaniam abeuntem Constantius ipse comitatus est vsque ad locum duabus columnis insignem, qui Laumellum interiacebat, & Ticinum. qui quidem locus nunc nullus est. Palatium regium

lib. 15. &
16.
lib. 15.
1448. &
1456.

gium à Traiano factum quidam memine-
runt. utrumque sit, ante Maximianū fuisse
Mamertinus ostendit. Verū paucis Au-
sonij poetę versibus; qui Gratiani præce-
ptor fuit, & vir consularis, narrationem
hanc concludemus: qui de claris orbis to-
tius vrbibus cōmemorans, post Romanam;
Carthaginem; Constantinopolim; Antio-
chiam; Alexandriamque; sextam quidem
homo Gallus Treuerensem ponit; Medio-
lanensem verò septimam: de qua honorifi-
centius non videtur ferè dicere potuisse:
ac satis erat, primo versu, omnia Mediola-
ni esse mirabilia dixisse: & ultimo; omnia
excellere, ita ut Romę non cederet: sed
enumerat multa tamen his verbis:

*Et Mediolani mira omnia: copia rerum:
Innumera; cultęque domus: facunda virorum
Ingenia: antiqui mores: tum duplici muro
Amplificata loci species: populique voluptas
Circus; & inclusi moles cuneata theatri:
Templa; palatinaęque arces; opulensq; Moneta;
Et Regio Herculei celebris sub honore lauacri;
Cunctęque marmoreis ornata peristylā signis:
Męniaque in valli formam circumdata limbo.*

Omnia

, Omnia que magis operum velut emula Formis
 , Excellunt: nec inſſa premit vicinia Roma.

Quorum quidam monumētorum, tem-
 poris, & hoſtium iniuria conſumptorum;
 quedam veſtigia adhuc manent, nam lo-
 cus eſt, vbi ad Palatium dicitur; vbi eſdes
 eſt magna S. Georgij nomine dicata; alius
 vbi ad Moneta, vbi eccleſia eſt S. Matthei;
 alius ad Circum, vbi S. Mariæ; alius ad
 Theatrum, vbi S. Victoris eccleſia eſt. Ve-
 rum de his ſatis, ſi pauca poſteriorum ſcri-
 ptorum teſtimonia addiderimus; & primo
 Gelafij Pontificis, circiter ann. fere quin-
 geſimum, qui in epiſtola ad Dardanos:
 Imperatores Mediolani habitaffe, ac ſe-
 dem habuiſſe obiter affirmat: Numquid
 , apud Rauennam, inquit, apud Mediola-
 , num, Sirmium, apud Treuiros multis tem-
 , poribus nō conſtitit Imperator? numquid
 , harum vrbiū ſacerdotes vltra menſuram
 , ſibi met antiquitus deputatam, quippiam
 , ſuis dignitatibus uſurparunt? Iornandes
 Gothorum epiſcopus, qui vixit ſub Juſti-
 niano Imper. hoc eſt circa ann. D. quin-
 geſimum ſexageſimum de Hunnis lo-

quens; Mediolanum, inquit, liguriæ metropolim; & quodam regiam urbem partemore deuastant: nec non & Ticinum equali sorte deiciunt: quid autem Liguria tum contineret, postea apparebit. Procopius eiusdem temporis grauiissimus scriptor græcus; prima, inquit, inter occidentis urbes post Romam esse hæc ciuitas (Mediolanum) creditur; & facile ceteras antecedere, ut magnitudine, ita & hominum copia, reliquisque item fortunæ bonis. Ac inferius eadem repetens, addit; Aduersus Germanos, & Barbaros alios propugnaculum est; &, ut ita dixerim, pro obice totius imperij Romani exposita. idem vero tradit inferius, ut urbis magnitudinem agnoscamus; cum a Gotthis capta est, in ea virorum tercenta millia fuisse trucidata, quo in numero mendum suspicatus, Sigonium tamen eadem referentem legimus. nunc ad ecclesiæ initia redeamus.

S. Barnabam huc sacrosanctum Evangelium attulisse, plures sunt auctores; non ij tamen omnes, de quibus ex nostris quidam, & Petrus quoque Galestinus in notationibus

tionibus ad martyrologium, affirmarunt. sed scripsit id Dorotheus Episcopus Tyri grecus auctor in Synopsi. item Hippolitus Martyr, vt refert in notationibus Martyrologij Romani doctissimus, atque optimus Baronius meus. post hos autem antiquos auctores plures alij scripsere, Blondus, Sigonius, Baronius idem in annalibus præterea traditum est à maioribus, mandatumque litteris, non solum in Mediolanensi, sed in alijs quoque prouinciæ ecclesijs, Brixienſi, Bergomenſi, Taurinenſi, confirmantq; templa in ipsis vrbibus, & alijs regionis locis eidem dicata. tum mōs etiam S. Barnabæ, prope Alpes de quo Bonauertura Castilioneus. Immo etiam quod argumentum haberi debet admodum graue; in Albingaunensis ecclesiæ libro veteri manuscripto, die vndecima Iunij huius Apostoli proprium officium, pluresque hymni habentur; quibus continetur; totā etiam regionem illam Ligusticam ab eo fuisse primo illustratā: cuius officij exemplum apud nos est. Monumentum præterea huius rei nobis pulcherrimū reliquit

In Lōbar.
de regn.
Ital.

De antiq.
Sufubrū.
led.

Andreas Alciatus: quod etiam N. Fontei-
us seu Fontana Mediolanensis ex vo-
lumine quodam Saxonico in Germania
sumpsit, sunt autem carmina ad fontem
S. Barnabæ olim Mediolani posita a S.
Protasio veteri episcopo Med., quæ pu-
tantur in excidio urbis fracta, & ab non-
nullis exscripta sunt vero hæc:

, *Hunc fontem tibi dedicat, atque Deo super undis*
, *Consecrat impositam famulus Protasius aram,*
, *Qua Ticina silex, & Martia porta, beate*
, *Barnaba, te ligures aduectum nuper in oras*
, *Audyt hortantem cætus, & ritæ Lauantem*

Deest versus.

, *flamine victo,*
, *Vt per te tua plebs Lustrali admota sacello,*

Alciatus sic habet frequentes versus,
, *Quàm facies est alba urbi, quam candida genti,*
, *Tam niueis animus colat intra mænia Christum.*

Fontei-
us autem sic

, *Atque hæc præcipue colat intra mænia Christum*
, *Urbs Mediolani ante Italas ingentior vrbes.*

Hic vero fons apud Ticinensem portā
eo nomine pie adhuc Mediolani visitur;
quod in eo S. Barnabas multos ex Me-
diolanensibus baptizauerit.

Ex duobus autem, quæ demonstran-
mus;

Quorū al-
terum al-
teri fidem
facit .

Ep. 54.

mus ; profana vr̄bis antiqua dignitate ; &
Apostolico S. Barnabæ officio ei tributo ;
vehementer cōfirmatur , id quod alioqui
dubium non est ; ecclesiastica , Metropo-
liticaque , ab initio vsque Mediolani di-
gnitas . non dico , ex dignitate vr̄biū pro-
fana , statim consequi ecclesiasticam ; quā
quam principum virorum opera , & eo-
rum qui possunt concessione , id plerum-
que consequitur : S. Leo ad Martianum
Augustum de Anatolio Constātinopol.
episcopo agens , qui sedem suam ꝑ ciui-
tas esset regia alijs contra veterum insti-
tutum , & Nicena decreta præferebat ;
, Habeat , inquit , sicut optamus , Constanti
, nopolitana ciuitas gloriam suam ; ac pro-
, tegente dextera Dei , diuturno clemen-
, tiæ vestræ fruatur imperio . alia tamē ra-
, tio est rerum sæcularium , alia diuinarū .
& Gelasius eadem de re agens in episto-
la iam memorata ad Dardanos : Risimus
, autem , ꝑ prærogatiuam volunt Acatio
, comparari , quia Episcopus fuerit regiæ
, ciuitatis . numquid apud Rauennā , apud
, Mediolanum , Sirmium , apud Treuiros ,
mul-

, multis temporibus non constitit Impera-
 tor? numquid harum urbium sacerdo-
 tes ultra mensuram sibi met antiquitus de-
 putatam, quippiam suis dignitatibus usur-
 parunt? &c. Licet hoc verum sit; negari
 tamen non potest; Domini prouidentia,
 qui suauis quadam ratione, & commoda,
 sua omnia constituit, atque ordinat; ini-
 tio plerumque euenisse; ut ecclesiasticus
 principatus constitueretur, ubi erat secu-
 laris; & praestantiores euangelij prae-
 dicatores, ad praestantiora quoque mitteren-
 tur loca; praeterquam, quod ex omni par-
 te id conuenire nemo non videt, & pe-
 ne esse necessarium. nam neque loca oia
 subito adire poterant Apostoli; & quae
 prima essent, ea primo adire, & ad aucto-
 ritatem firmitus, & ad propagationem ex-
 peditius erat: itaque tum in Oriente, tum
 in Occidente videmus, quae urbes prouin-
 ciarum praecipuae, vel capita quaedam fue-
 runt; eas ab Apostolis, vel apostolicis vi-
 ris fere institutas; & vel Patriarchales,
 vel Metropolitanas sedes antiquitus esse
 constitutas. Antiochia, Alexandria, alia-

Ep. 84.

rumque; tū in Italia Rauennæ, ac Aquileiæ exempla sunt in promptu. immo in singulis prouincijs id reperire possent, quibus otium esset, vrbes, deinde etiam maiores episcoporum dignitates, cognoscere. Prudentissimè igitur idem S. Leo in epistola ad S. Anastasium Ep. sine dubio inemor, quid de Constantinopolitani Antistitis alioqui temeritate sentiret; sic ait: Quibus (episcopis) cum sit dignitas communis, non est tamen ordo generalis: quoniam & inter beatissimos Apostolos in similitudine honoris fuit quedam discretio potestatis: & cum omnium par esset electio, vni tamen datum est, ut cæteris præemineret. De qua forma Episcoporum quoque est orta distinctio: & magna dispositione prouisum est, ne oēs sibi omnia vendicarent; sed essent in singulis prouincijs, quorum inter fratres haberetur prima sententia; & rursus quidā in maioribus vrbibus constituti, sollicitudinem susciperent ampliore, per quos ad vnā Petri sedem vniuersalis Ecclesiæ cura conflueret, & nihil vsquam a suo ca-

pite

7 pite dissideret. ita S. Leo. Quo loco &
 maiorum urbium in auctoritate Metro-
 politica constituenda habitam esse ratio-
 nem; & in singulis prouincijs id factum
 fuisse, confirmat: tum duplicem etiā Me-
 tropolitæ auctoritatem tangit; primæ in
 sacris consultationibus sententiæ; & am-
 plioris in administratione ecclesiastica
 sollicitudinis, in qua ordinandorum pro-
 uinciæ episcoporum cura, atque auctori-
 tas includitur. totam vero rem ad Apo-
 stoli cum institutum referre S. Leo vide-
 tur: cui consentiunt canones ecclesiasti-
 ci, a Gratiano, & alijs allati. Arquē singu-
 las prouincias administratione eiusmodi
 ab initio ecclesiæ rectas esse; ita ut &
 ad Metropolitanam auctoritatem Episco-
 pi, & eorum ordinationes, ecclesiæque
 omnes, nulla excepta, exemptæ, refer-
 rentur; vetēres canones, quos breuitatis
 causa non describimus, Nicæ, Antio-
 chiæ, Laodicæ, Sardicæ, Carthaginis, Tau-
 rini, alijsque demonstrant: quibus Inno-
 centij Pontificis, aliorumq; Pontificum
 decreta consentiunt. Ex his omnino de-

Dist. 30.

Nic. 16.

Ant. c. 29.

Laod. c. 12.

Sardi. c. 5.

& 7.

Carth. 3.

c. 7.

Taurin. c. I. Inno. ad Victricum c. I. in vita SS. Apost. Petri, & Pauli.

cuit & Apostolum Barnabam Mediolanum ad Galliam Cisalpinam euangelio illustrandam venire; & primam ibi prouinciæ ecclesiasticæ dignitatem institui. quinimmo si Metaphrasti credimus, etiâ ipse Apostolorum princeps Petrus quandoque Mediolanum vidit. Atque Metropolitanæ dignitatis fundamenta ipso initio etiam ex eo videre licet; quod vt apud nonnullas prouinciæ ciuitates litteris mandatum est; ipse S. Barnabas Mediolano ad eas venit, & ibi quoque christianos instituit. & non solum S. Barnabas, sed Anathalon quoq; , & Caius eius discipuli, & successores eò venerunt; ita vt Brixia Anathalonis etiam corpus sibi vendicet. eiusmodi autem ecclesiarum visendarum officiû, Metropolitana quædam erat administratio, quemadmodum quidem ea rerum initia ferebant: neque enim subito christiana res vbique ita constitui poterat, vt episcopº dari posset aut deberet: vt potius ab alio episcopo amplioris frequentiorisq; loci regenda esset: quemadmodum hoc quoque tempore

pore de plurimis oppidis euenit. 7 Quæ verò ciuitates tunc episcopum habuerint, difficile est affirmare: Mediolanensium quidem Episcoporum a S. Barnaba continuata series habetur à multis iam edita: de qua nos alibi latius, sic De^o iuuat, acturi sumus. Brixienfis Ecclesia; vt de hac primo dicamus, quoniã vt Cœnomanorum caput, secunda ponenda videtur post Mediolanensem; episcopos suos nonnullos illius primi sæculi commemorat; idem facit Bergomensis, & Ticinensis: pleræque vero aliæ a tempore fere Constantini Imp. numerant Episcopos suos. sed illis euenit, vt cum primos episcopos primo tribuant sæculo, alijs deinde pluribus sæculis caruisse ostendant: id quod fortasse etiam ob vehementes fidelium perpersiones aliquo spatio fieri potuit; nisi credibilius videatur, studio scriptorum, non satis plerumq; grauius id euenisse; qui ad vrbium suarum dignitatem pertinere putarent, primos episcopos antiquissimos habere ita Bergomenses fatentur ducentis annis Epi-

scopum non habuisse. Brixienſes id ta-
 citè demonſtrant; cum epiſcopos tantū
 numerāt quinque ante Philaſtrium, qui
 ſanctitate floruit circiter annum Domi-
 ni tercentefimum octogefimum. Tici-
 nenſes quoque ante Criſpinum primū,
 quem ſub Leone Pontifice fuiſſe certum
 eſt, vt ex epiſtola Synodica ad ipſū Leo-
 nem inferius apparebit, Syrum tantum-
 modo, cum Iuuentio, ac Pompeio eius
 diſcipulis, ſeu ſocijs, & Vrſicenum po-
 nunt. igitur quattuor Epiſcopos ſolum
 habuerunt annis amplius quadrigentis
 quinquaginta. quos omnes cum ad pri-
 ma Eccleſiæ tempora, Ticinenſes refe-
 runt, reliquis ſæculis eccleſiam Epiſcopo
 ſpoliant. At tempore S. Ambroſij hoc
 eſt circiter annum tercentefimum octo-
 geſimum epiſcopum habuit Eccleſia Ti-
 cinenſis, quem ſanctum idem Ambroſi⁹
 in libris officiorum appellat. neq; omni-
 no veriſimile eſt, per ea tempora, quibus
 Eccleſiæ paganorum ſequitia liberatæ flo-
 ruerunt, urbem aliquam modo nō igno-
 bilem epiſcopo ſuo caruiſſe. Neque pu-
 tet

tet quis Chrispinum secundum Leonis
 tempore fuisse: sed primum, nam Epi-
 phanius, Maximus, & Enodius ante Cri-
 spinum alterum fuerunt, ut etiam Ticinē-
 ses scribunt: & ijdem tamen fuere post
 Leonis tempus. Mihi quidem probabi-
 le semper visum est; Euentium Episcopū
 Ticinensem tempore S. Ambrosij fuisse:
 quem Ticinenses dicunt Inuentium, cū
 facilis sit mutatio: idque ea coniectura
 quam postea Baronio meo in notationi-
 bus martyrologij, & recte probari uidi;
 & haud merito mea quidē sententia de-
 feri: quid enim si aliud statuerant, qui
 Ambrosium nuper emendauerant? an ne-
 cesse est omnino eos recte emendasse?
 coniectura autem hæc est: epistolæ syno-
 dicæ S. Ambrosij ad Syricium Pontifi-
 cem inter alios episcopos subscripsit E-
 uentius, nullo urbis adscripto nomine;
 sicuti neque alijs. idem nomen Aquile-
 iensi synodo, cui S. Ambrosius interfuit
 subscriptum est, adiecto nomine eccle-
 siæ, sed corrupto: legitur enim duobus
 modis, Citiniensis, & Tiniensis emenda-

tores

tores operum S. Ambrosij Cenetensem fecerunt Euentium in ea epistola; argumento ex subscriptione Aquileiæ synodi ducto; nam neque in veteri exemplari eorundem operum Basilicæ Ambrosianæ nomen Ecclesiæ Euentio adiectum est, neque arbitror in alijs exemplaribus, quæ alibi habentur. Sed vt id non probem, duo præcipuè faciunt: alterum est, quod non video cur Cenetensis episcopus, qui sub Aquileiensi Metropoli omnino esse oportebat; Mediolanum uenerit, vt Mediolanensis Ecclesiæ epistolæ subscriberet: alterum est, quod Cenetensis episcopi mentionem, equidem nō inuenio, nisi post annos ab synodo Aquileiæ tercentos in sexta synodo generali. ipsa etiam corrupta verba proximiora videntur Ticinensi nomini, quam Cenetensi. Itaque rursus emendandum locū arbitror, in libris tum Ambrosianis, tum epistolarum pontificiarum Romę nuper editarum: vbi alia etiam quædam nomina malè adiecta puto. Historia quidem Syri, & Euentij, quę a Mombrizio iam pri-

dem

dem, nūperque in septimo sanctorum to-
mo auctior edita est, ad Vespasiani, atq;
adeo Nerōnis tempora Euētiū refert.
quam historiam secutus est Ado: sed ea
longe post id tempus, de quo significat
scripta est, quemadmodum legenti appa-
ret: nam & Papiæ nomen habet. & alias
etiam ob causas, doctis auribus non sa-
tis fidei in multis facit: & illud etiam ob-
stat, quod paulo ante dixi, nullum relin-
qui episcopum sæculo S. Ambrosij, quē
tamen non defuisse, & ratio suadet, & S.
Ambrosius affirmat. Afferrem ipsarum
quoque Ticinensium historiarum aucto-
ritatem; quæ habent Inuentium contra
Arianos decertasse; nisi eas in ceteris an-
tiquis rebus viderem nimis hallucinari.
Sed de his hæcenus; neque enim Eccle-
siarum, quæ ad metropolim Mediolanē-
sem pertinent, plenam historiam conte-
xere institui; sed aliqua tantum commē-
morare, quæ ad ipsam Metropolim de-
monstrandam in primis sunt accomoda-
ta: & vero etiam tæderet propriam vr-
bium historiam inuestigare: cum supe-
rio-

rioribus sæculis, atque etiam nostris, qui
dam, non opinor mala mente, sed rebus
ijs certe destituti, quæ ad scribendam
historiam necessariæ sunt, patriarum re-
rum immoderato quodam studio incita-
ti, eiusmodi historias plerisque in locis
corruperint; ex quorum iugis vix po-
tuerit docti viri, si qui negotium sumpse-
runt, vera quæ inuoluerentur, excerpe-
re quorum apud nos quidem unus fuit
ante annos ferè centum *Tristanus Chal-*
cus, rerum non solum *Mediolanensium*,
sed etiam *Italicarum* scriptor gravissimus;
ut omittam *Alciatum* illum, cuius doctri-
na ubique peruulgata nostro non indiget
testimonio.

8. Nunc actiones *Metropoliticae* *Episco-*
porum, qui *S. Barnabæ* successerunt cõ-
memorandæ sunt: quamquam difficile
fuerit in episcopis illis priscis usque ad
Constantinum propter afflictationes assi-
duas fidelium; scriptorumque summam
penuriam. Sed, ut alios auctores omittam,
Tristanus noster scribit, tempore *Com-*
modi imp. à S. Calimero Episcopo Me-
dio:

diolanensi, qui ad vniuersæ liguriæ fidē,
salutemque multum traditur contulisse;
Dertonensibus datum Episcopum Mar-
tianum eius discipulum. nam, vt dixim⁹,
insignem vrbein Dertonē appellat Stra-
bo; deinde a Materno, qui ad res eius ec-
clesiæ recognoscēdas eo se contulit, Ma-
liodorum Dertonensem Leuitam. qua
ex re antiquissimum equidem prouin-
ciæ episcopatum Dertonensem puto.
Alia non occurrit actio, quæ ad propo-
situm argumentū pertineat vsque ad Con-
stantij Constantini filij tempus, cuius Im-
peratoris iussu, & seditiosorum quorun-
dam episcoporum instigatione, qui Prin-
cipis animum corruperant, in varijs pro-
uincijs conuocata sunt concilia, nomine
quidem ad S. Athanasium condemnan-
dum, sed re uera ad impietatem Arianā
insinuandam: vt vel pios episcopos, &
populos cum eis ad eam perducerent;
vel si repugnarent; eis pulsīs, Arianos in-
truderent; sicuti re ipsa Mediolani pul-
so Dionysio, Auxentium Cappadocem
non episcopum, sed violentum ecclesiæ

Lib. 3. de occupatorem, ut S. Ambrosius ait, con-
 sp. s. c. 11. stituerunt; qui quidē vnus Arianus Me-
 diol. Ecclesiam cōpluribus annis oppres-
 sit. Dionysius igitur cum esset episcop⁹;
 Vrsatius, Valens, & alij quidam episcopi
 exteri homines Constantij auctoritate
 etiam Mediolani, vt in Metropoli, con-
 cilium haberi curarūt. Eusebius tum vi-
 uēbat, Episcopus Vercellēsis magnæ san-
 ctitatis, nominisque sacerdos; Mediola-
 numque ad eum conuentum venire re-
 cusauerat; quod fortasse rem totam me-
 lius nosset, quę ab impijs illis tentabatur.
 sed adduxerunt eum tandem vt veniret.
 narremus vero quid acciderit ipsi⁹ S. Hi-
 larii Pictauensis Episcopi verbis, qui tum
 Libellū ad larium Pictauensis Episcopi verbis, qui tum
 Constan- fuit ex præcipuis fidei catholicæ propu-
 tium. gnatoribus: Venio nūc, inquit, ad id qđ
 recens gestum est; in quo se etiam pro-
 fessio sceleris in secreto artis suæ dedi-
 gnata est continere. Eusebius Vercellen-
 sis episcopus vir est omni vita Deo ser-
 uiens. hic post Arelātensem synodum,
 cum Paulinus Episcopus tantis istorum
 sceleribus contraxisset; venire Mediola-
 num

, hum præcipitur, collecta iam illic mali-
 , gnantium synagoga. decem diebus ad
 , ecclesiam est veritus accedere, dum ad-
 , uersus tam sanctum uirum malitia se per-
 , uersa consumit. Soporatis deinde con-
 , filijs omnibus; ubi libitū est, aduocatur.
 , adest una cum Romanis Clericis, & Lu-
 , cifero Sardiniaë episcopo. Conuentus ut
 , in Athanasium subscriberet, ait, de sacer-
 , dotali fide prius oportere constare; cō-
 , pertos sibi quosdam ex ijs qui adessent,
 , hæretica labe pollutos. expositam fidem
 , apud Nicæam, cuius superius memini-
 , mus, posuit in medio, spondens omnia
 , se quæ postularent, esse facturum, si pro
 , fidei professione scripssissent. Dionysius
 , Mediolanensis episcopus chartā primus
 , accepit. ubi profiteri scribendo cœpit;
 , Valens calamum, & chartam e manibus
 , eius violenter extorsit; clamans non pos-
 , se fieri, ut aliquid inde gereretur. Res
 , post clamorem multum deducta in con-
 , scientiam plebis est. grauis omnium do-
 , lor ortus est: impugnata est à sacerdoti-
 , bus fides. Verentes igitur illi populi iu-
 , dicio

Lib. 2. hist.
159.

, dicitum, e Dominico ad palatium tran-
 , seunt . cuiusmodi sententiam in Euse-
 , bium longe antequam ecclesiam ingre-
 , deretur, scripserint, de se loquitur ipsa
 , sententia . hæc Hilarius . Sulpitius item
 , Seuerus Episcopus Bituricensis, qui eo-
 , dem fere vixit tempore, idem narrat,
 , hoc modo . Interea Mediolanum conue-
 , nitur, vbi tum aderat Imperator . eadem
 , illa contentio nihil inuicem relaxabat .
 , tum Eusebius Vercellensium, & Lucifer
 , à Caralis Sardinia, episcopi relegati . ce-
 , terum Dionysius Mediolanensium sacer-
 , dos in Athanasij damnationem se cōsen-
 , tire subscripsit, dummodo de fide inter
 , Episcopos quæreretur . Sed Valēs, & Vr-
 , fatius, ceterique metu plebis, quæ catho-
 , licam fidem egregio studio cōseruabat,
 , non ausi piacula profiteri, intra palatium
 , congregantur . illinc epistolam sub Im-
 , peratoris nomine emittunt omni prau-
 , tate refertam, eo nimirum consilio, vt si
 , ea æquis auribus populus recepisset, pu-
 , blica auctoritate cupita proferrent . Sin
 , aliter fuisset excepta; omnis inuidia ef-
 , fer

, set in rege, & ipsa venialis; quia etiam
 , tam catechumenus sacramentum fidei
 , merito videretur potuisse nescire. Igi-
 , tur lectam in ecclesia epistolam populus
 , auersatur. Dionysius quia non esset as-
 , sensus, vrbe pellitur; statimque eius in
 locum episcopus subrogatur. ita Seue-
 rus. Ex his obseruare licet loci dignita-
 tem episcopi Mediolanensis, vt Metro-
 politanis qui primus in conuentu episcopo-
 rum, chartam accepit, vt fidem profiteretur.
 quæ res confirmatur ex eo, quod S.
 Athanasius de eodem negotio in apolo-
 gia scripsit; quem Theodoretus, Sozo-
 menusque secuti sunt: Dionysium Italiae
 metropolitanum, seu vt alij, mediolani
 primariæ vrbis Italiae Episcopum vna cū
 alijs à Constantio imper. in exilium eie-
 ctum: quod autem Sozomenus medio-
 lanum Albam nominet; ne quis miretur,
 in scriptis quibusdam rerum nostrarum
 minime contemnendis idem nomen vr-
 bis quandoque reperi. obseruandum est
 etiam: quod obiter dictum sit; addita-
 menta quædam huius historiae non posse

Apolo. de
 f. a 335.
 lib. a. c. 15.
 lib. 4. c. 8.

D

pro-

probari, quæ multi ex sermone quodam
inter Ambrosianos posito, sumpsere :
quem sermonem maximo Taurinensi ple-
rique tribuunt : initium certe simile ha-
bet sermoni maximi in festo S. Eusebii
die habito ; reliqua vero longe diuersa,
vt ex editione sermonum maximi Ro-
mana perspicitur. quis eius sit auctor,
non facile dixerim. videtur quidem si
quædam inspicias episcopi Vercellensis ;
& eius qui non valde remotus fuerit ab
ætate Eusebii . si vero alia consideres ;
eius videtur, qui longe admodum ab eo
sæculo fuerit ; cum Eusebium dicat mar-
tyrem, quod veterum dixit nemo : immo
res ab Eusebio, Dionisioque gestas vere
ignorauerit, vt ipse quoque profiteretur.
quod enim ait, simulasse Eusebium se gra-
uiter ferre, quod filium Dionysium in
subscriptione sibi præposuissent, ij præ-
fertim, qui filium Dei patri Deo equalem
negarent ; præter quam quod commen-
titium nescio quid, ac insulsum olet : re-
pugnat ijs quæ attulimus ex Hilario, &
Seuero, & omnino historiæ veritati ; ne-

que

que enim Ariani Episcopi illi, se se Arianos dici patiebantur; aut filiū patri æqualem palam negabant; quod tamquam rem manifestam inepte posuisset Eusebius: immo id ducebant grauis iniuriæ loco, quemadmodum notū esse necesse est ijs, qui historiam eorum temporum non ignorant: catholicos, & Nicænæ fidei studiosos se fingentes, Athanasij tantum condemnationem Episcoporum subscriptionibus confirmari, callide curabant; vt eo quasi gradu ad impia contra fidem decreta progredierentur; vt ex So-

Lib. 4. c. 8.
Lib. 5. c. 15

zomēno Cassiodorus dilucide narrat in tripertita. quod etiam ex ijs quæ Hilarius, Seuerusque dicunt, satis apparet: alioqui si studiose impietatem ij non occultassent, eos mediolanensis in primis populus lapidibus obruisset, vt idem Hilarius aperte significat. Prætereo, quod licet ætate, vel etiam sanctitate potuerit Eusebius dici Dionysij pater; non ideo tamen erat, cur primum postularet in synodo subscribendi locum; contra quam etiam narrat Hilarius; non otiose attin-

Pro S. A-
than.lib.2
105.

mans Dionysium primum chartam accepisse, vt profiteretur. Verum est, Dionysium contra Athanasium subscripsisse, vt etiam Lucifer Caralitanus his verbis testatur ad Constantium: Sed credo ad-
 , huc tentas negare, non te idcirco perse-
 , qui nos, quia noluerimus christiani fieri
 , Ariani. quomodo negare poteris, cum
 , sanctissimum Dionysium Mediolanen-
 , sium episcopum, qui iam tibi falsa credēs
 , damnauerat Athanasium, quod Arianus
 esse noluerit, miseris ad exilium? subscri-
 psit inquam sed ita subscripsit errore fa-
 cti deceptus, si de fide inter episcopos
 quæreretur: vt Seuerus ait. omnino hoc
 Dionysij factum satis excusant Patres,
 qui eum tam illustri sanctitatis laude af-
 ficiunt, ac potius restitisse condemna-
 tionem commemorant. Ac in eo fidei ne-
 gotio curando primas tamen partes S.
 Eusebio tribuit S. Ambrosius; cum ait,
 Vt Eusebius sanctus prior leuauit vexil-
 lum confessionis; ita beatus Dionysius
 in exilij locis propiore martyribus titulo
 vitam exhalauit: ex huiusmodi vero

Ep. ad Ver
cell. 665.

sub

subſcriptione narratio illius ſermonis cō-
ſtata videtur; & in eo quaſi fundamento,
vt fit, fabula ſucceſſu temporis extructa
illius Euſebianæ artis.

9. Tranſeamus nunc ad metropoliticas
S. Ambroſij actiones; cuius tēpore, quā
perrexerint Imperatores urbem Medio-
lanenſem colere; ex ipſius ſcriptis; alio-
rumq; historijs facile omnes intelligunt.
in his autem actionibus commemoran-
dis ordinem temporis ſeruare minime
proſitemur. Atque occurrit primo Syri-
cij Papæ epistoſa, quam ad Eccleſiam Me-
diolanenſem, hoc eſt ad S. Ambroſium,
& episcopos prouinciæ Mediolanenſis
dedit; ſignificans ſe damnaſſe Iouinia-
num, & alios quosdam, qui virginita-
tem, ieiuniaque docebant eſſe reiſcien-
da: vt hæreſim ipſi quoque damnarent.
Reſpondit Ambroſius, etiam episcoporum
ſuorum nomine; hæreſimque illam
latius refutauit, damnauitque. epistoſæ
habentur in libris S. Ambroſij; in volu-
minibus conciliorum; nuper etiam inter
Pontificias epistoſas Romæ editas: quas

hic breuitatis caussa nō exscribimus. sed
 epistolæ Mediolanensi subscribere episcopi octo. Euentius, Maximus, Felix,
 Balsianus, Theodulus, Eustasij duo, Cōstantius; & Geminiani nomine Aper pre
 sbiter. postremo adduntur hæc verba; &
 omnes ordine subscripserunt. dolet non
 mediocriter veteribus exemplaribus nō
 esse adiecta ecclesiarum; immo etiam re
 liquorum episcoporum nomina, quæ de
 esse vltima verba demonstrant: vt Eccle
 siæ possent priscos Sanctos patres suos
 agnoscere. Sed ex Aquileiensi concilio
 nonnulla possunt adscribi; cum illud sub
 Damaso, cui successit Syricius, habitum
 sit, & S. Ambrosius interfuerit. quæ ra
 tio nimis valuit apud eos, qui postremo
 Ambrosium Romæ ediderunt, vt superi⁹
 tetigimus. quotquot enim nomina ea
 dem vtroque loco viderunt, ijs locum ec
 clesiæ in concilio notatum apposuerunt:
 sed respiciendum erat, ad conciliū Aqi
 leiense conuenisse pluribus ex prouin
 cijs episcopos; Ambrosium vero ex prou
 incia sua tantum conuocasse: vt licet
 idem

idem nomen esset; non idem tamen Episcopus putandus esset; si non prouinciæ Mediolanensis esset. Omnino autem probabile videtur; Euentium esse Ticinensem, ex ijs quæ superius dixi: Bassianum Laudensem; Sabinum Placentinum; Felicem Comensem; quos alioqui constat eodem tempore fuisse. Arausicanum vero, & octo durensem episcopos Gallos; & Turgentinum ex Illyride, cur Ambrosius aduocauerit? Geminianus pro quo Aper subscripsit, Mutinensis fuit, vt obseruauit Sigonius.

de occid.
imp. lib. 9.
ann. 382.
ep. 82.

Quod S. Ambrosius ad Vercellensem ecclesiam scribit, quæ post Limenij mortem adhuc episcopo carebat; solitudinem Metropolitanam, de qua S. Leo tangit, & veteres canones explicant; vt superius notauimus, demonstrat: Conflictor dolore, inquit, quia ecclesia Domini quæ est in vobis, sacerdotem adhuc non habet; ac sola nunc ex omnibus Liguriæ, atque Aemiliæ, Venetiarumque, vel ceteris finitimis Italiæ partibus, huiusmodi eget officio, quod ex ea aliæ sibi

, ecclesiæ petere solebant: & quòd vere-
 cundius est, mihi adscribitur vestra in-
 tentio, quæ affert impedimentum. nam
 cum sint in vobis dissensiones, quomodo
 possumus aliquid aut nos decernere, aut
 vos eligere, aut quisquam acquiescere
 &c. inferius vero, Conuenit igitur &c.
 modestiæ vestræ, & concordia insigni-
 edere, vt congruatis assensu ad postulan-
 dum sacerdotem. hæc S. Ambrosius.
 Ex quibus apparet, Vercellensium fuisse
 eligere ac postulare episcopum, vt ijs
 temporibus mos fuit; Ambrosij vero vt
 Metropolitani decernere, ac ordinare:
 de quo more S. Leo in epistola ad Ana-
 stasium ita explicat: Cum ergo de sum-
 mi sacerdotis electione tractabitur, ille
 omnibus præponatur, quem cleri, ple-
 bisque consensus concorditer postu-
 larit; ita vt si in aliam forte personam par-
 tium se vota diuiserint, Metropolitanis
 iudicio is alteri præferatur, qui maiori-
 bus, & studijs iuuatur, & meritis &c.
 Interim vero S. Ambrosius illud saltem
 officij tribuit ecclesiæ Vercellensi; vt ad

Ep. 82.
 dist. 63.
 cap. vlt.

con-

concordiam, sanctam electionem, christianamque disciplinam. longa epistola cohortaretur: tum etiam ad hæresim illā cauendam, quæ, vt diximus, ab eo, in Synodo damnata est, Audio inquit, homines, qui dicunt nullum esse abstinentiæ meritum, nullum frugalitatis, nullam virginitatis gratiam, &c. simul probat, quod ante diximus, Ambrosij tempore ecclesias episcopis suis non caruisse. Neque frustra liguriæ, Aemiliæ, Venetiarumque ecclesias, cum alijs quibusdam Italiæ finitimis commemorasse videtur: quasi eas omnes significet ad Metropolim Mediolanensem, & ita ad curam suam pertinuisse. Venetiæ tunc, etiam regionem quæ olim Cœnomanorum fuit continuisse videntur, vt latius probari posset: & ita aliæ regionis eius ecclesiæ iuris fuerunt Mediolanensis, aliæ vero Aquileiensis. Italiæ finitimas, Rhetiarum, alpinaeque ecclesias intelligas licet. Liguria vero: si forte id quoque monere aliquem oporteat: eo tempore etiam Insubres, ac ceteros populos, quos antiqui transpadanos dixe-

dixere; continebat. Quod autem officium episcopi alias ecclesias à Vercellensi petisse dicit sanctus Antistes; significat S. Eusebium ita suos instituisse discipulos, ut ex eis aliæ sibi ecclesiæ postularent episcopos.

64. 65.

Eandem auctoritatem Metropolitanā etiam in Veronensi ecclesia ostendunt epistolæ ad Syagrium episcopum Veronensem. scribit enim de iudicio suo in causa Indiciæ Virginis, quæ leuiter in suspicionem violatæ virginitatis, ut rea, ab episcopo vocata, appellasse videtur S. Ambrosij iudiciū; qui quidem eam S. Marcellinæ eius sorori traditam, absoluit; episcopumque vehementer reprehendit. Prospiciendum esse, inquit, ne de nostro obloquantur iudicio charissimi nostri Veronenses, proprijs texuisti litteris. non arbitror fore. certe non solent. aut si obloquantur; de quo obloqui soleant, haud dubie liquet; cum exasperati huc veniant; pacifici ad te reuertantur: præsertim cum hoc iudiciū nostrum cum fratribus, & sacerdotibus

, nostris participatum processerit. & inferius. Qui tamen &c. vbi in meo astiterunt iudicio, cum primo de origine causæ quærerem, diuersa, & distantia promiseret, non locorum separati, sed mendaciorum diuortio. ita S. Ambrosius, qui alia quoque vsque ad finem epistolæ, de illius causæ actione refert. postremo dicit, Indiciam inoffensi virginem muneris se pronunçiasse; calumniatoresq; excommunicasse. ostendit autem primis verbis, non hoc solum Virginis iuditium Veronense coram se actum; sed alia quoque eiusdem vr̄bis agi consueuisse.

Bononiensis quoque cum ceteris Aemiliæ ecclesijs, Metropolis fuit Mediolanensis. quas quidem ecclesias, aut plerasque Valentinianus iij. Imperator cum Placidia matrē in Rauennam propensior, postea Rauennati Archiepiscopo curauit adiungi, vt Blondus ex Rauennate scriptore Agnello retulit; licet Rauennates auctores postremi contra auctoritatem etiam suorum perturbantes historiam eidem adiunctos antea fuisse scri-

Decad. 1.
lib. 2.

ann. 1450.
ep. 83.

Ep. 46.

scribant. De Bononiensi quidem ecclesia fatetur Sigonius in libro de episcopis Bononiensibus. eoque spectat, quod S. Ambrosius scripsit ad episcopos per Aemiliā constitutos; licet doctrinæ aliquis Antistitis, non iuri fortasse id tribuet. idem significare videtur vir sanctus, cum ad Eusebium Bononiensem Episcopum ei valde familiarem scribens, de Mediolanensi, & Bononiensi puero iocatur. Valentinianum enim ferocem dicit indignatum se, quod Metropolitanus vir Bononiensi subditus nescio quomodo fieret. educabantur pueri & virgines Bononienses disciplinæ sanctæ gratia Mediolani ad præscriptum Ambrosij, & Marcellinæ. qua de re ipse ita in libro de virginibus: Denique de Placentino sacrandæ virgines veniunt; de Bononiensi veniunt; de Mauritania veniunt, ut hic videntur. magnam rem videtis: hic tracto, alibi persuadeo. Ac adiumentum seu suffragium quod ei Bononiensis episcopus ea in re, quam ipse piscationem appellabat, afferbat, tangit inferius, cum is esset

set præsens, Et bene accidit, inquit, quia
 nos laboraturos Dominus sciebat, & an-
 xium de socijs, ministrauit. adest pesca-
 tor ecclesiæ Bononiensis aptus ad hoc pi-
 scandi genus. da Domine pisces, quia de-
 disti adiutores. Eodem refertur, quod
 Bononiæ reliquias sanctorum martyrum
 Vitalis, & Agricola, ipsæ præcipuè tran-
 stulisse videtur, vt ex ipso, & ex Paulino
 presbytero intelligitur.

lib. 3. in fi.

Præterea vero ad Constantium scri-
 bens, qui nuper factus erat episcopus in
 Aemiliæ vrbe: Commendo, inquit, tibi
 fili ecclesiam, quæ est ad forum Cornelij,
 quo eam de proximo interuistas frequen-
 tius: donec ei ordinetur episcopus. oc-
 cupatus diebus ingruentibus quadrage-
 simæ tam longe non possum excurrere.
 Fauentia episcopum crediderim Con-
 stantiū, quæ Foro Cornelij, hoc est Imo-
 læ proxima est. nam Bononiensis Euse-
 bius, vt diximus, appellabatur. Fauentia
 vero quandoque se contulisse Ambro-
 sium Paulinus auctor est.

ep. 44.

De Comensi quoque ecclesia, & eius
 epi-

ep. 5.

episcopo Felice referendum est, ad quē
 , vt a se ordinatum hęc S. Ambrosius scri-
 , bit inter alia : Bonum fœnus spiritalis gra-
 , tiæ, quod ueniens Dominus cum vsuris
 , exiget; & cum te bene dispensasse inue-
 , nerit; dabit tibi plura pro paucioribus:
 , eritque mihi fructus dulcissimus: quod
 , meum in te iudicium comprobabitur;
 , ordinatio non reprehendetur, quam ac-
 , cepisti per impositionem manuum mea-
 , rum, & benedictionem in nomine Do-
 , mini Iesu. quibus verbis non officium so-
 , lum ordinationis; sed iudicij quoque, &
 , approbationis demonstratur. quale au-
 , tem iuris Metropolitici sit argumentum;
 , ordinatio, & approbatio, veterum conci-
 , liorum canones, & Pontificum decreta
 , superius allata satis ostendunt.

lib. 2. c. 29

Curæ Metropolitice erga Ticinensem
 , ecclesiam indicium est in officiorum li-
 , bris; vbi de seruandis ijs, quæ in eccle-
 , sijs deposita sunt, contra quamlibet po-
 , tentiam, siue ea viduarum sint, siue alio-
 , rum; Meministis, inquit, ipsi, quotiens ad-
 , uersus regales impetus, pro viduarū, im-

mo

, mo omnium depositis certamen subieri-
 , mus. Commune hoc vobiscum mihi:
 , recens exemplum ecclesiæ Ticinēsis pro-
 , feram; quæ viduæ depositum, quod su-
 , sceperat, amittere periclitabatur. inter-
 , pellante enim eo, qui sibi illud imperiali
 , rescripto vindicare cupiebat; elerici nō
 , tenebant auctoritatem: honorati quo-
 , que, & intercessores dati, non posse præ-
 , ceptis imperatoris obuiari ferebant, lege-
 , batur rescripti forma, directio magistri
 , officiorum statuta; Agens in rebus immi-
 , nebat, quid plura traditum erat. tamē
 , communicato mecum consilio, obsedit
 , sanctus episcopus ea conclauia, ad quæ
 , translatum illud depositū viduæ cogno-
 , uerat. quod vbi non potuit auferri, rece-
 , ptum sub chirographo est. postea iterū
 , flagitabatur ex chirographo. præceptū
 , Imperator iterauerat, ut ipse per semet-
 , ipsum nos conueniret. negatum est; &
 , exposita diuinæ legis auctoritate, & serie
 , lectionis, & Heliodori periculo, uix tan-
 , dem rationem imperator accepit. post
 , etiam tentata fuerat obreptio; sed præ-
 uenit

, uenit sanctus episcopus, ut redderet vi-
 , duæ quod acceperat. hæc S. Ambrosius.

V. t. S. Am
 br. in fi.

Sed ea quoque magis expressa fuit eccle-
 siæ eiusdem cura, quam Paulinus refert.
 eidem ecclesiæ Ticinensi sacerdotem or-
 dinasse paulo antequam in eum mor-
 bum incideret, ex quo ex hac vita deces-
 sit: ut iam duos episcopos Ticinenses
 Ambrosij tempore habeamus; cum ne-
 minem relinquunt, qui primos eius vr-
 bis episcopos ad ecclesiæ initia referre
 conantur.

10 Nouariensi quoque ecclesiæ traditur
 à nostris S. Simplicianus, qui S. Ambro-
 sio successit, Gaudentium Eporedien-
 sem, olim S. Martini discipulum ordi-
 nasse. cui rei consentiunt scripta Noua-
 rienfium vetera.

11 Sed pulcherrimum extat monimen-
 tum huius Metropolitici iuris tēpore S.
 Leonis Pontificis. id epistola est S. Euse-
 bij episcopi Mediolanensis, qua contra
 Eutychianam heresim Leonis ipsius de fi-
 de sententiam antea iam ad orientales,
 tunc ad se Missam, vna cum coëpiscopis
 suis

suis collaudat: epistolam vero ipsam,
 quoniam neque longa est, & integras ha-
 bet episcoporum subscriptiones, hic de-
 scribendam putauimus. licet ea habeatur
 inter opera S. Leonis; & in tomis epi-
 stolarum Pontificiarum. Domino san-
 cto, & beatissimo Patri Leoni, Eusebius
 Mediolanensis episcopus. Reuersis Do-
 mino annuente, fratribus nostris, quos
 ad orientem fidei causa solcite proui-
 da beatitudo vestra direxerat; decursis-
 que litteris, quas per eos tua sanctitas de-
 stinavit: omni exultatione in Christo re-
 leuatus sum; quod effectum commissæ
 sibi legationis eisdem reportasse, vestra
 pagina designauit. Nec mirum, quod
 Dominus noster Iesus Christus Catholi-
 cæ fidei, quam tenemus maiestatis suæ
 gratiam, custodiamque præstiterit; quan-
 do vos idoneos cultus sui assertores in
 Apostoli sui sede Præsules collocauit;
 qui & recta sentire de incarnationis do-
 minicæ sacramento, & eadem potestis
 recte custodire. Admonitis ergo fratri-
 bus, & coëpiscopis meis, habitoque con-
 E uentu,

uentu, uestrarum formam tenuimus li-
 terarum, quam recensens epistolam bea-
 titudinis uestræ in sacerdotum Domini
 concilio, quam sanctus frater, & coëpi-
 scopus noster Abundantius, & compres-
 byter meus Senator detulerant, agnita-
 que eorum narratione, sicut scripta ve-
 stra significauerant, rerum gestarum or-
 dine, continuo requisita est, recitataque
 epistola, quam fidei assertionem plene di-
 gestam, ad orientem dudum sanctitas ue-
 stra transmiserat: quæ ad nos ex uestra
 admonitione, sancto fratre, & coëpisco-
 po nostro Ceretio mutuante, peruenit:
 clauit eam plenam fidei simplicitate ful-
 gere: prophetarum etiam assertionibus;
 euangelicis auctoritatibus, & Apostoli-
 cæ doctrinæ testimonijs, nitore quodam
 lucis, & veritatis splendore radiare; om-
 nibusque sensibus conuenire, quos bea-
 tus Ambrosius de incarnationis domini-
 cæ mysterio, suis libris sancto spiritu ex-
 citatus inseruit. & quia omnia maiorum
 fidei, nobis antiquitus traditæ tota puri-
 tate conueniunt; domine sancte, & be-
 tissi-

,tissime pater ; placuit omnibus, quorum
 , subscriptio subter annexa nomina pote-
 , rit declarare : vt eos qui impie de incar-
 , nationis dominicę sacramento sentiunt,
 , quamuis intellectus sui prauitate, a ca-
 , tholicę fidei veritate recedentes, seipfos
 , dignos abiectione fecerint ; suo etiam
 , consensu, auctoritatis vestrę præceden-
 , te sententia, damnatione congrua perse-
 , quendos.

, Litterarum ergo vestrarum formam se-
 , cuti modū præscriptę ordinationis nos
 , seruasse, his per fratrem, & coëpisco-
 , pum nostrum Cyriacum missis ostendi-
 , mus. superest vt annuente Domino, per-
 , fectis rebus, palmam fidei & consummati
 , certaminis coronam quiete perpetua re-
 , tipientes, hoc futuris memorabile sæculis
 , relinquatis ; vt ab hoc tempore præsen-
 , ti, extincta impię sectę contumacia vi-
 , deatur ; vt vobis propugnatoribus in æter-
 , num prostrata succumberet. & alia ma-
 , nu. incolumem beatitudinem tuam sum
 , ma diuinitas tueatur, atque custodiat, do-
 , mine sanctę, & beatissime pater.

, Ego Eusebius episcopus ecclesię Medio-
 , lanensis in omnia supradicta consensu &
 , subscripsi, anathema dicens his, qui de
 , incarnationis dominicę sacramento im-
 , pia senserunt . eadem formula reliqui
 , subscripsere . hi autem sunt,
 , Fauentius Episcopus Rhegiensis ec-
 , clesię,
 , Maioranus Placentinę
 , Cyprianus Brixillensis
 , Quintinus Dertonensis
 , Crispinus Ticinensis
 , Maximus Taurinatis
 , Floreus presbyter iussus a presente San-
 , cto Eulogio episcopo suo ecclesię Ipo-
 , riensis, quia ipse per infirmitatem sub-
 , scribere non poterat .
 , Gradus presbiter directus ab episcopo
 , suo ecclesię Augustanę
 , Cyriacus Laudensis
 , Abundantius Comensis, pro se, & pro
 , absente Sancto fratre .
 , Asimone episcopo ecclesię Curiensis pri-
 , mę Rhetię .
 , Paschasius Genuensis

, Pastor Astensis
 , Simplicius Nouariensis
 , Ioannes Cremonensis
 , Octavianus Brixianæ
 , Iustianus Vercellensis
 , Quintinus Albingaunensis
 , Præstantius Bergomatis
 Ex quibus quidem subscriptionibus metropolis hæc cognoscitur totam pene Galliam cisalpinam, cum Liguribus, alpinisque populis, quod initio diximus, continuisse. nam quod ultra Rhegiensem alias ecclesias non habuerit S. Eusebius, vt olim S. Ambrosius; Valentinianus eius nominis tertius, non multo ante fecerat, qui vt memorauimus, multas ecclesias Rauennati addixit episcopo: quæ prima fuit huius metropolis deminutio: atque hinc perspicitur non omnes eas ecclesias a Valentiniano quidem ecclesie Rauennati fuisse addictas, quas enumerat Blondus, quandoquidem hic Placentinum, Brixillensem, & Rhegiensem episcopos subscriptos vides. credibile vero est, Exarchatum Rauennæ postea constitutum

cap. 8. inter
 p. 10. d. 10.
 p. 10. d. 10.
 p. 10. d. 10.
 p. 10. d. 10.
 p. 10. d. 10.

ad eam metropolim rursus amplifican-
dam valuisse.

12. Postea nobis occurrit S. Epiphanius Ep. Ticinensis ordinatio à Mediolanensi Antistite facta; sicut S. Enochius Ep. Ticinensis in eius vita satis ostendit, non ea quidem, quæ primo surij tōmo mutila, nescio cuius culpa edita est; sed ea quæ septimo, cui vaticanus codex à nobis ad hoc inspectus consentit, narrat ibi Enochius Epiphanium Episcopum Ticini electum Mediolanum ductum esse, & ibi consecratum, à quò vero ipse non explicat; sed verisimile est à Geruntio, Benignouè Præsulibus sanctitate claris qui post Eusebium fuerunt. Idem scribit Alciatus in historia patriæ lib. 3. quamquā vir alioqui doctissimus in tempore erat.

13. Sequitur deinde S. Laurentius Archiep. i eo iā nomine metropolitā eo tēpore frequentius appellabant; atque eo utitur Symmachus Pontifex ad hūc clarissimum Antistitē scribens. Interfuit is concilijs Romanis Symmachi ipsius iussu, & causa celebratis; quibus monis

ep. 8. inter
Pōtificas
& concil.
vol. 2.
Concil.
tom. 2.

mentis ita metropolis hæc probatur: ut
 post ipsum Pontificem primum locum
 Mediolanensis Antistes obtineat; & Ra-
 uennati præferatur: quod obseruauit etiã
 , Gratianus: his verbis, Hoc quoque no- 15. c. ult.
 , tandum est, quod in hoc concilio; & in
 , alia Synodò Symmachi Papæ, ante Ra-
 , uennatem episcopum, Mediolanensis
 , subscripsisse, & respondisse, legitur: ex
 , quo & sedis prerogatiuam ante eum ha-
 , bere colligitur: ita Gratianus: 7 Hunc an-
 tistitem, & eius actiones summis lau-
 dibus celebrauit Ennodius Episcopus
 Ticinensis vir suo tempore doctrina,
 virtuteque admodum clarus; & epi-
 scoporum quidem Mediolanensium stu-
 diosissimus, quos plerofque carmin-
 bus singillatim laudauit: sed Laurentio
 in primis deditus: in cuius natali lauda-
 tionem habuit: cuius res gestas ma-
 gnis laudibus, versu, prosaque oratione
 extulit, quemadmodum eius impressili
 belli testantur. Quod autem eum in lau-
 datione, & in quibusdam etiam versibus
 summum Pontificem appellet, intelligi

debet inter episcopos, ac Pontifices suæ
 prouinciæ: nam eiusmodi verborum
 vsus adhuc ad Romanum Pontificem so-
 lum, cui vni vere, ac propriè debetur, om-
 nino redactus non erat; quemadmodum
 & Papæ nomen. Ac ad eandem Archi-
 episcopalem dignitatem, & ad ipsum
 quoque Laurentium referri debet, quod
 idem auctor. S. Ambrosium in hymno,
 inuocans, precatur, licet abstrusiori qua-
 dam, vt mos eius fuit, oratione,
 Sedis memento lux tuæ;
 Exorna sancte posteros;
 Auctore fuitus nobilis;
 Ne dux ferent culminis;
 In nube tactus horreat;
 Qui pastor est antistitum,
 Quod fugat omne summoiet,
 Gregem gubernat principum,
 Magister est docentium.

14. Alia metropolis Mediolanensis testi-
 monia suppetunt in S. Gregorij, alio-
 rumque Pontificum litteris: sed post tot
 tantaque antiquitatis monumenta; vide-
 tur iam superuacaneum in re, quæ adhuc
 per-

perspicitur, & vsu præsentī confirmatur,
 pluribus agere. tantum beati Mansueti
 Archiepiscopi Synodicam epistolam cō
 memorabimus, quam ad Constantinum
 iiij. Imp. dedit; quæ habetur in concilio-
 rum voluminibus. cuius titulus, & ini-
 tium est, epistola Mansueti episcopi Me-
 diolanen. ad Constantinum Imp. Domi-
 no Serenissimo, atque tranquillissimo, &
 a Deo coronato, religiosissimo Constan-
 tino Imperatori, Mansuetus Mediola-
 nensis metropolitanae ecclesiae indignus
 episcopus; vel vniuersa sancta episcopo-
 rum fraternitas, quæ in hac magna regia
 vrbe conuenit, æternam in Domino sa-
 lutem. Si apicem imperialis fastigij &c.
 Ob monothelitarum hæresim cōcilium
 habuit Mansuetus, circiter annum Do-
 mini sexcentimum octogesium, &
 contra ipsam pro catholica fide scripsit.
 dicitur autem Damianus episcopus Ti-
 cinensis eam epistolam composuisse a
 Paulo diacono, quem Platina, & alij se-
 cuti sunt. Agatho item Pontifex ob ean-
 dem causam concilium episcoporum

tom. 2. an
 te sextam
 synodum.

lib. 6. c. 4.

centum viginti quinque habuit; & pro
fide catholica libellum Synodi nomine
ad Constantinum misit, vna cum legatis,
qui concilio interfuerunt Constantino-
poli celebrato in Secretario sacri palatij;
quod dicebatur Trullus. hæc sexta Syno-
dus est vniuersalis. sed cum Damianus
ep. Ticinensis epistolam nomine Man-
sueti, Synodiq. composuisset; ex hac vi-
ta paulo post migrasse videtur: nam Ana-
stasius eiusdem vrbis episcopus libello
Synodi Romanæ vna cum alijs prouin-
ciæ Mediolanensis episcopis post Man-
suetum subscriptus est. quorum hæc sunt
, subscriptiones. Mansuetus Dei gratia
, episcopus sanctæ Mediolanensis ecclesię
, in hanc suggestionem, quam pro aposto-
, lica nostra fide vnanimiter construxi-
, mus subscripsi.
, Ioannes in dignus episcopus sanctæ ec-
, clesiæ Bergomatis &c. I
, Donatus episcopus sanctæ ecclesiæ Lau-
, densis &c.
, Anastasius episcopus sanctæ ecclesiæ Ti-
, cinensis &c.

,Valentinus episcopus Sanctæ Ecclesiæ
,Aquensis &c.
,Desiderius episcopus sanctę ecclesiæ Cre
,monensis &c.
,Gratianus episcopus sanctæ ecclesiæ No
,uariensis &c.
,Desiderius episcopus sanctæ eccl. Epo
,rediensis &c.
,Ioannes episcopus sanctæ ecclesiæ Ge
,nuensis &c.
,Deusdedit episcopus sanctę eccl. * &c.
,* Audacis episcopus sanctæ ecclesię Der
,tonensis &c.
,Benenatus episcopus sanctæ ecclesiæ A
,stensis .
,Benedictus humilis episcopus sanctæ ec
,clesiæ Valuentis
,Bonus episcopus sanctæ ecclesiæ Albi
,gaunensis
,Theodorus humilis episcopus sanctæ ec
,clesiæ Vercellenfis
,Rusticus humilis episcopus sanctæ eccle
,się Taurinatis
,Ioannes episcopus sanctæ ecclesiæ Vinti
,miliensis

Sequi-

Sequitur deinde subscriptio episcopi Lunensis, & aliorum qui ad hanc metropolim minime pertinent. quod deest ecclesiae nomen vni ecclesiae assignandum est ex ijs, quae desunt. quae quidem sunt, Brixien-
 sis, Comensis, Augustana, Curien-
 sis, Placentinus autem episcopus, Rhegien-
 sis, Mutinensis, & reliqui; de quibus huic metropoli ademptis iam diximus, post Rauennatem metropolitanum suū subscribere. mirari autem quis possit vnde irrepperit postrema omnium subscriptio, Magni episcopi ecclesiae Papiensis: nam & superius loco suo Anastasius Ticinensis subscriptus est; neque Magnum habet in episcoporum suorum numero Papienses. sed est valde probabile, pro Popiliensis, dictum esse, Papiensis, in exarchatu namque erat Forum Popilij: & ita dicta est ecclesia Popiliensis, sicuti eodem loco Liuiensis & Corneliensis.

15 De metropoli satis, superq. dictum: nam eximia Archiepiscopi Mediolani posterioris temporis incrementa, dignitatem, auctoritatemq. insigniter auctam

hoc

hoc quidem loco omittimus: quia potius ad humanum splendorem, ac principatum, quam ad ecclesiasticam auctoritatem pertineant. is enim iam inde quidem a S. Gregorio Pontifice Italici regis creandi, coronandiq. ius sibi vendicans; post annum certe septingentesimum septuagesimum tertium, hoc est extincto regno Longobardorum, a Carolo magno exercuit; atque inter Principes magnis potestatis humanæ titulis, opibusq. floruit, ut passim historie docent. illud potius nunc attingendum est; quo tempore, quæ ratione multæ ecclesiæ eisdem metropoli detractæ sint. quo in genere primo in vniuersum dicere possumus: quod postquam per singulas prouincias Ecclesiæ nascentis gubernatio, ut S. Leo loco superius memorato ait, instituta est: si qua Ecclesia a Metropoli, prouinciaq. sua postea vnquam detracta est; vel adiuncta fuit alteri Metropoli, ut de Bononiensi, ac alijs quibusdam iam diximus: vel si sui iuris effecta est, & ab alijs prouincijs separata: id euenit ob nouum aliquem

Sigon. de
re Ital. lib.
1.601. li.4
773. lib.6.
961. lib.8.
1002. &
1027.

aliquem principatum, quem ciuitas adepta est: quod quidem, vigente imperio occidentali, cum Imperatores omnia tenebant, videtur in Italia fieri non potuisse; sed demum post Italiam barbarorum occupatione diuisam: nam & Romani Pontifices per ea prima sæcula prouinciarum gubernationem cum Episcoporum ordinationibus metropolitanis, & concilijs prouincialibus ea ratione permittebant; quam sacri canones, & decreta Pontificum multa superius citata satis probant. Ad Ticinensem quidem Ecclesiam Longobardorum Reges, qui ea in vrbe sedem habuere, videntur metropoli suæ detrahere cœpisse: nam ea est fere Principum consuetudo, vt vbi resident, eius vrbis episcopum, vel alijs episcopis præesse, vel saltem nemini parere velint, præter Romanum Pontificem. quod si quidem etiam si Principes negligunt, ipsi episcopi saepe curant; & ex eorum sese potentia offerunt. quod cum sit omnino verisimile, plurimisq. doceatur exemplis confirmatur etiam auctoritate Pau-

li diaconi; cuius hæc sunt verba: Tunc
 , quoq. venit Benedictus Archiepiscopus
 , Mediolanensis Romain; & causam egit
 , pro ecclesia Ticinensi: lectus est; co-
 , quod à priſcis temporibus Ticinēſes epi-
 , ſcopi à Romana fuerant eccleſia conſe-
 crati; hunc fecit uſus eſt Anaſtaſius biblio-
 thecarius, Platina, & alij; quorum non-
 nulli addunt aliquid: ſed ex hoc quaſi
 fonte hauſere omnes: ſuit uero tum Pon-
 tificex Conſtantiuſ, reſq. accidiſſe uide-
 tuſ anno Dñm. ſeptingenteſimo decimo
 quinto ex eo loco apparet; Ticinēſem
 eccleſiam à Mediolanēſis Archiepiſco-
 pi potestate iam ante ceptam aliquo mo-
 do ſubtrahi: id quod Regum illorū po-
 tentia non iure aliquo factum credibile
 eſt: quod cum uideret Benedictus; uir
 egregiæ ſanctitatis etiam Pauli ipſius te-
 ſtimonio; ratus ſibi rem ſilentio minime
 prætereundam; neque permittendū,
 ut tacite ius eccleſiæ ſuæ eriperetur: ſum-
 mū Pontificem adiit. nam quod à pri-
 ſcis temporibus epiſcopum Ticinēſem
 à Romana eccleſia conſecratum Paulus
 affir.

affirmat; id tantummodo de longobar-
dorum temporibus accipiendum est; qui
iam ante annos circiter centum quadra-
ginta quinque Ticini regnabant. atq. ita
prisca illa tempora hoc omnino spatio
concludenda sunt. nam alioqui & S.
Ambrosius ecclesiæ Ticinensi ordina-
uit episcopum, vt retulimus ex Paulino:
& S. Epiphanium ab Antistite Mediola-
nensi consecratum superius demonstra-
uimus. Duo igitur videbantur quodam
modo contraria: alterum est, quod a Ro-
mano Pontifice non autem ab Archiepi-
scopo Mediolanen. iam longo temporū
interuallo consecrabantur episcopi Ti-
cinenfes; quod erat imminuti iuris Me-
diolanen. argumentum. alterum, quod
ijdem a metropoli Mediolanensi nulla
iuris, auctoritate exempti erant ad Syno-
dos Mediolanenses veniebant; & inter
episcopos prouincię censebātur; quem-
admodum vel ex hoc postremo Mansue-
ti Med. Damianique, ac Anastasij Ticinē
suum facto apparet; qui paucis annis an-
te Constantinum Pontificem fuere. Hoc

vero cōtra confirmabat ius ecclesiæ Medi-
 olan. Ita merito potuit Benedictus Ar-
 chiepiscopus antiquum ecclesiæ suæ ius
 sibi vindicare; causamq. deferre ad Ro-
 manum Pontificem. nam, & nefas est de
 viro sancto putare; quòd ius illud sibi
 vindicare, & ideo Romam petere vo-
 luerit, idoneis aptisq. argumentis destitu-
 tis; vt quidam temere videntur affirma-
 re: & si ecclesia Ticinēsis omnino adhuc
 sub Mediolanensi fuisset, Paulus non ita
 loqueretur: licet alioqui Mediolanensi-
 bus minime videatur fauere. potius pri-
 uilegium tunc primum concessum affir-
 maret. nunc autem litem institutam signi-
 ficat; Benedictumq. Archiepiscopum in-
 victum. Hęc victoria qualis fuerit, non
 explicat; sed intelligēda videtur ex eius
 verbis, vt Pontifex ipse Ticinensem epi-
 scopum ordinare pergeret; quæ quidē
 vt imminutio quēdam iuris Archiepisco-
 palis erat; ita neque integra ratio vide-
 batur ecclesiæ Ticinensis ex Metropoli
 Mediolanensi eximendæ. potuit enim
 Pontifex, vt vniuersalis metropolites pri-
 uile-

uilegij gratia, consecrationem illius episcopi sibi referuare; neq; in ceteris propria metropoli subtrahere. sed ex eo tempore mihi quidem neq. consecrationes, neque synodicae actiones episcoporum Ticinensium suppetunt; quæ pristinum ius Archiepiscopi demonstrent. contra vero Ticinensis episcopi priuilegia pallij, crucisque adhibenda ostenduntur; quæ ecclesiæ exemptæ certa videntur argumenta. quæ tamen ante annos circiter quadringentos ab *Alexandro iij.* vt *Platina* auctor est, cum alijs Pontificiarum rerum scriptoribus, ei adempta sunt. in quo quid iuris statuendum sit, alij viderint.

Ecclesia Genuensis, cum ea respubl. iam amplificata esset, ab *Innocentio ij.* circiter annum domini millesimum centesimum trigésimum tertium *Mediolanensi* adempta metropolis ipsa facta est; vt idem *Platina* auctor est; & *Episcopus Nebiensis*.

Taurinensem a *Sixto iij.* *Mediolanensi* metropoli detractâ scribit *Pingonius*:
me-

metropolim vero factam; primumq. in
 ea Archiepiscopum creatum a Leone X.
 De Augustana, Comensi, alijsque nō-
 nullis, neque noui quando sint detractæ,
 neque adhuc quæsiui. ac de Comensi qui
 dem Benedictus Iouius, cum affirmare
 non posset, filere fortasse potius debebat.
 Hi vero episcopi ad synodos à Carolo
 Cardinali Archiepiscopo superioribus
 annis celebratas nulla controuersia con-
 uenere: quemadmodum ipsi synodorū
 libri continent: Vercellensis, Alben-
 sis, Viglebanensis, Dertonensis, Casalensis,
 Aquensis, Brixien-
 sis, Cremonensis, Ale-
 xandrinus, Bergomensis, Laudensis, No-
 uariensis, Astensis, Sauonensis, Intimilien-
 sis. Aliarum quidem ecclesiarum episco-
 pos ad Synodum vocandos Caroli consi-
 liarij, cum primum ille Mediolanum Ar-
 chiepiscopus venit, existimarunt, aucto-
 ritate libri vsi, qui prouincialis dicitur, in
 quo Albingaunensis, & Placentinus huic
 metropoli adiecti sunt; Papiensis autem,
 & Ferrariensis ita, vt eos ab ea tamen ex-
 emptos fuisse, adnotetur. sed negotium
 postea

postea Carolus omisit grauioribus occupatus: licet eius rei, vt magnæ cuiusdam concertationis, quæ nulla fuit, inanem historiam quidam scripserint.













734